

ფრე ავსტრიელებთან

თბილისი. “ზურევსტნიკის” სტადიონი. 11 ივლისი.

“დინამო” (თბილისი) – “ვინერ ნეიშტადტი” (ავსტრია, ვენა) – 2:2 (0:1).

“ვინერ ნეიშტადტი”: როზენციტელი; ნუსბაუმერი, კოლარი, ფრანკოლეინი, შტაიგერი, ჰუტფლესი; ოფენბახი, პუშნიკი (ვენცელი), პიჰლერი (გაისლერი), ნეჟდაჟერი, ლეფორი.

“დინამო”: კოტრიკაძე (კვასხვაძე); ბ. სიჭინავა, თორაძე, ხოჭოლავა; ზეინკლიშვილი (იაშვილი), იამანიძე; მელაშვილი (მესხი), ხუნდაძე, კალოევი, გ. სიჭინავა, დათუნაშვილი.

მსაჯი: ს. ალიმოვი (მოსკოვი).

ავსტრიელთა მიერ ბაქოსა და ერევანში ჩატარებულმა მატჩებმა ცხადყო, რომ ისინი არ მიეკუთვნებიან “დიდი ფეხბურთის” კეტეგორიას და ამიტომ გუშინდელ შეხვედრას თბილისის “დინამოსათვის” ფაქტიურად უნდა ჰქონოდა თავისებური სპარინგის ხასიათი იმ უაღრესად საპასუხისმგებლო მატჩისათვის, რომელიც მათ 14 ივლისს აქვთ სსრ კავშირის ჩემპიონსა და თასის მფლობელთან – მოსკოვის “ტორპედოსთან”.

მატჩი დაიწყო იმით, რომ სანამ დიქტორი აცხადებდა გუნდების შემადგენლობებს, ავსტრიელებმა შუა მინდორში გაითამაშეს კომბინაცია. ოფენბახმა კართან მიაწოდა ბურთი, სადაც “დინამოს” მცველებმა ცუდად მოიგერიეს იგი და საჯარიმო მოედნის მახლობლად ღიად დარჩენილმა პუშნიკმა შორიდან დაარტყა კარში. კოტრიკაძე, ეტყობა, არ იყო მზად ბურთის მისაღებად და მხოლოდ თვალი გააყოლა მას – 1:0.

ამ გოლის გაქვითვა თბილისელებს მრავალჯერ შეეძლოთ, ვინაიდან ფორვარდები საკმაოდ იოლად გადიოდნენ დრიბლინგით როგორც ცენტრალურ ზონაში, ისე ფლანგებზე, მაგრამ კარის სიახლოვეს, სწორედ იქ, სადაც საჭიროა ბურთიანად გასვლა, ისინი იწყებდნენ გაუთავებელ გადაცემებს, კარში დარტყმისათვის ხანგრძლივად ისწორებდნენ ბურთს, ქმნიდნენ შეჯგუფებას და “ხელცარიელი” ბრუნდებოდნენ მინდვრის შუაგულში, რათა კიდევ და კიდევ დაეწყოთ უნაყოფო, უშედეგო შეტევა.

გუშინდელ თამაშში ჩვენს გუნდს მრავალი ნაკლოვანება ჰქონდა, მაგრამ მათგან მთავარი აღნიშვნის ღირსია გადაცემათა აბსოლუტური არასიზუსტე. მელაშვილი, ზეინკლიშვილი, იაშვილი და სხვანი ისეთ მომენტებში ვერ აძლევდნენ პარტნიორებს ბურთს, ისეთ სიტუაციაში კარგავდნენ მას, რომ მაყურებლები გაცემაში მოჰყავდათ, ტაქტიკურად კვლავ არასწორად ითამაშა იამანიძემ, რომელსაც რატომღაც ნორმად მიაჩნია ბურთით გაირბინოს მინდვრის ნახევარი, მოატყუოს მინიმუმ 3 მოწინააღმდეგე და მხოლოდ იმიტომ, რომ ისევ მათ ჩააბაროს ბურთი.

ამ მხრივ ჩვენს გუნდს საუკეთესო მაგალითი ჰყავდა იქვე მინდორზე – ვეტერანი ავსტრიელი ფეხბურთელი – პიჰლერი, რომელსაც ბრწყინვალედ ესმის თამაში, მხედველობის არეში ჰყავს თავისი გუნდის ყველა წევრი და შეუცდომლად აწვდის მათ ბურთს. მეორე ბურთი სწორედ მან გაიტანა ოფენბახთან გათამაშებული მახვილგონივრული კომბინაციის შემდეგ.

0:2, როცა მატჩის დასასრულამდე 30 წუთია დარჩენილი, საგანგაშო ანგარიშია, ამიტომ დინამოელებმა მთელი ძალები თავდასხმაში გადაისროლეს, სადაც ზედიზედ გადიოდა გარღვევაზე მესხი, უამრავი გამოყენებული მომენტის შემდეგ, 24-ე წუთზე კალოევმა გაქვითა პირველი გოლი, ხოლო 10 წუთის შემდეგ დათუნაშვილმა ბურთის ლამაზი გადატანით თავს უკან გაათანაბრა ანგარიში – 2:2.

განვლილი მატჩი არ ჩაითვლება დინამოელთა აქტივში. მათ აშკარად სუსტად, ქაოტურად ჩაატარეს იგი.

12 ივლისი, 1961 წ.